

Il museum d'art survegn dapli piazza tras in engrondiment

■ (cc) La regenza ha deliberà la missiva davart l'engrondiment architectonic dal Museum d'art dal Grischun per mauns dal cussegl grond. Il museum basegna ina surfatscha d'exposiziun pli gronda ed infrastrukturas modernas. L'edifizi Sulser existent duai vegnir remplazzà tras in edifizii nov. Quai mussa er il resultat d'ina concorrenza d'architettura ch'è en il fratemp terminada. La situaziun funcziunala ed architectonica actuala dal Museum d'art dal Grischun, situà a la piazza da la Posta da Cuira, na cuntenta insumma betg, e quai pervia da la mancanza da spazi ch'exista gia dapi decennis. Gia en la concepziun chantunala da museums da l'onn 1976 è vegnì cumprovà in basegn da spazi da 3800 meters quadrat per il museum d'art. La renovaziun che ha gì lieu en il fratemp, la restauraziun e la trasformaziun dal museum dals onns 1987 fin 1990 n'han er betg laschà gudagnar marcantamain dapli spazi. Cun circa 1900 meters quadrat stat a disposiziun oz al museum d'art la mesadad dal spazi ch'è vegnì definì avant 36 onns.

Locals moderns per ovras e per exposiziuns

L'engrondiment architectonic che la regenza propona ussa per il museum duai eliminar las mancanzas d'infrastructura e crear localitads da museum modernas. La missiva ch'il cussegl grond vegn a tractar durant la sessiun da zercladur prevesa ina surfatscha d'exposiziun supplementara da circa 2700 meters quadrat. Il basegn da spazi actual dal museum da totalmain 4600 meters quadrat vegn pia ademplì dal tuttatg. En il futur pudess vegnir preschentada ina part commensurada da la collecziun d'art dal Grischun

e pudessan vegnir surpigliadas dapli exposiziuns temporaras attractivas d'auters museums d'art.

Oz pon vegnir mussads al public mo 3 pertschient da l'entira collecziun d'art en l'exposiziun permanenta dal museum en la villa Planta ed in spazi minimal per exposiziuns temporaras en l'uschenunà edifizii Sulser permetta da realisar mo paucas cooperaziuns attractivas cun auters museums. Ultra da quai na pon betg vegnir observads ils standards areguard la segirezza ed il clima dals locals.

L'edifizii Sulser duai vegnir remplazzà tras in edifizii nov

Differents studis da realisabladad ch'èn vegnids incumbensads avant la planisaziun da museums mussan che – pervia da las relaziuns da spazi precaras sin l'areal dal museum – l'engrondiment necessari na sa laschia strusch realisar u alura mo cun dischavantatgs considerabels, senza stuaier demolir l'edifizii Sulser ch'è da princip classifitgà sco degn da vegnir mantegnì.

Ils resultats d'ina concorrenza d'ar-

chitectura ch'è vegnida realisada – per motivs da temp – il medem mument sco l'elavuraziun da la missiva conferman uss ils resultats da quests studis preliminar, preschentads en la missiva. Tut ils 18 projects ch'èn vegnids inoltrads prevesan da remplazzar l'edifizii Sulser ch'è adattà mo limitadamain per exposiziuns d'art. Sco victur da la concorrenza ha la giuria nominada designà il biro d'architettura Barozzi Veiga da Barcelona cun il project «Die Kunst der Fuge». Sin la segunda piazza suonda il project «Hyllis» dal biro

d'architettura EM2N da Turitg. La terza piazza ha cuntanschì il project «Alberto» da Valerio Olgiati da Flem.

Tenor la giuria fascinescha il project victur tras ses piazzament precis e cler en ils conturns architectonics. Locals bain proporziunads per la collecziun ed ina structura flexibla dals locals per las exposiziuns temporaras han persvadì er dal puntg da vista funcziunal. Il biro d'architettura Barozzi Veiga ha gia realisà plirs edifizii da cultura e gudagnà concorrenzas per museums d'art, sco tranter auter l'onn passà quella per il Musée des beaux arts da Losanna.

La finanziaziun è garantida per dus terzs tras ina donaziun generusa

Ils custs d'investiziun per quest engrondiment dal museum importan 28,5 milliuns francs. Questas investiziuns bruttas sa scuntran cun entradas da 20 milliuns francs or d'ina donaziun liada ad in intent specific (communicaziun da la regenza dals 7-6-2011). Per il chantun resta pia ina investiziun netta dad 8,5 milliuns francs. Il cumenzament da las lavurs da construcziun è previs per l'october 2013. L'avertura dal museum d'art engrondì pudess esser pussaivla il settember 2015.

Indicaziun d'ina exposiziun

Tut ils 18 projects da la concorrenza d'architettura ch'è vegnida publicgada sin plaun internaziunal vegnan exponids publicamain dals 3 fin ils 29 d'avrigl 2012 en il museum d'art dal Grischun a Cuira. L'entrada a l'exposiziun dals projects è libra. Il rapport da la giuria po ultra da quai vegnir consultà e chargià giu da la pagina d'internet da l'uffizi da construcziun auta dal Grischun sin www.hochbauamt.gr.ch.



Il Museum d'art dal Grischun vegn engrondì e renovà.